

四庫全書薈要·乾隆御覽本

集部

欽定四庫全書蒼要卷一萬七千二百四十五

集部

御定歷代賦彙卷二十六

地理

浮淮賦

有序

魏文帝

建安十四年王師自譙東征大興水軍汎舟萬艘時予
從行始入淮口行泊東山覩師徒觀旌帆赫哉盛矣雖
孝武盛唐之狩舳艫千里殆不過也乃作斯賦云

沂淮水而南邁兮汎洪濤之湟波仰巖岡之崇阻兮經

東山之曲阿浮飛舟之萬艘兮建干將之銛戈揚雲旗
之繽紛兮聆榜人之謹誦乃撞金鐘爰伐雷鼓白旄冲
天黃鉞扈扈武將奮發驍騎赫怒於是驚風汎涌波駭
衆帆張羣櫂起爭先逐進莫適相待

浮淮賦有序

魏
王
粲

建安十四年春三月王師自譙東征大興水軍浮舟萬
艘秋七月始自渦入淮口將出淝水經合肥旌帆之盛
誠孝武盛唐之狩舳艫千里不是過也時粲以丞相掾

隨行承命同作斯賦

從王師以南征兮浮淮水而遐逝背渦浦之曲流兮望
馬丘之高澁汎洪槽於中潮兮飛輕舟乎濱濟建衆檣
以成林兮譬無山之樹藝於是迅流興潭浪濤波動長
瀨鈺鼓若雷旌麾翳日飛雲天迴蒼鷹飄逸滂沛洶溶
遞相競軼飛驚波以高驚馳駭浪而赴質加舟徒之巧
極美榜人之閑疾白日未移前驅已屆羣師按部左右
就隊舳艫千里名卒億計運茲威以赫怒清海隅之芥

帝濟元勳於大舉垂休績乎遠裔

漢津賦

漢蔡邕

夫何大川之浩浩兮洪流淼以玄清配名位乎天漢披
厚土而載形發源自乎蟠冢引漾澧而東征納暘谷之
所吐兮兼漢沔之殊名總吠澮之羣液兮演西土之陰
精遇曼山以左迴兮迴襄陽而南縈切大別之東山兮
與江湘乎通靈嘉清源之體勢兮澹澶浚以安流鱗甲
育其萬類兮蛟龍集以嬉遊明珠胎於靈蚌兮夜光潛

乎玄洲雜神寶其充盈今豈魚龜之足收於是游目騁
觀南援三州北集京都上控隴坻下接江湖導財運貨
貿遷有無既乃風颭蕭瑟勃焉並興陽侯沛以奔驚洪
濤涌而沸騰願乘流以上下窮滄浪乎三溼觀朝宗之
形兆看洞庭之交會

漢江賦

有序

明興獻帝

序曰天地間為瀆者四而漢江居其一發源於興元之
嶓冢經漢中沸鄖襄距豐郢合潛沔至大別出江而朝

宗於海誠荆南之險壯而人臣之輸忠者取鑒焉夫漢
嘗淳涵於唐平於伯禹職方於明古今冒厥利吾幸宅
於此實襟帶之固將資忠於藩屏以副九重眷託之心
而禹之明德蓋亦不可忘者邪因作漢江賦若郭景純
木玄虛成公綏之江海河賦殆未易追蹤者也見者其
無謂焉賦曰

洵妙有之肇播兮闢天地於崇卑貫山岳之血脈兮距
渤澥而派茲殷廣漢之浣演兮混靈源於嶓冢穴礪谷

之縈紆兮滄洪流而洶涌削萬里而直下兮曷沙磧之
能壅遡天靈之奕葉兮浩瀕洞其惕悚森地軸之浸涵
兮咨民居之匪康糾龍蛇於萬壑兮毒吞噬而巢窟其
彷徨帝命禹作司空兮慨鯨績以遏懷襄殫神思之集
勞兮信決導之有方忘呱子而懲入門兮卒告功於平
成屏塵氛與災瘴兮洽文命於八紘貽兆世之巨利兮
薦明德之芳馨悵至聖之浸遠兮適支裔之休明何辛
受之汨常兮染惱淫於斯邦豔游冶之靡麗兮滌新化

於文王紛淑慝之積習兮夫豈漢水之所漸濡淪元氣
之精華兮協氤氳而敷腴挺人物之瓌竒兮鬱隱顯而
異需孕吉甫之文武兮順履霜之孝子淬德公之峻操
兮藻冰鑑之雅士表向寵之淑均兮烈習珍之英偉老
東之之相才兮壯柳惲之書生憐子美之忠愛兮著浩
然之幽貞喟張問之拒新法兮矯孟珙之劔金師歆叔
敖之政教兮諤季良之諫隨毅連萬夫之罵賊兮瘁庭
芝之勤王艾漢陰叟之戒機心兮炳文考之圖靈光嗟

人傑之降生兮固長川之所經緯彼鱗羽之蕃息兮亦

餘潤之分美背負鼃鼃之鼎負兮目比鰈鮓而不相離

鬣鼓鯤鯨之騰簸兮翼飛鯨於澗池銳蛇尾之鮭鱗兮

森鶴羽之靈翹曳六足之鮎鮓兮戴八極之神鼃文屋

瓦之蚺兮聲嬰兒之篩轉車輪之蠶兮覆金鈔之鮎物

鮎鯢鯉之瑣碎兮咸亭育而無遺嗟生生之不窮兮

復飛動之繁滋匹嚶渚之雉鳩兮羣在淙之鳧鷖唼來

賓之鴻鴈兮號淒清之鷓雞介戢翼之鴛鴦兮下振振

之鷺委胎化之仙禽兮炫能鳴之鷺澤虞長鳴而不去

兮象主守之官雖鷄之行且搖兮况兄弟之急難鷺一

足而馱三目兮又有兩首之鸚鵡似魚而鷄似雞兮鼈

入海而為蛤水狗驛馬厥類孔多兮石蛙神蜃紛其含

和或湊集於淺瀨兮或浮泳於滄波或啄攫於稻梁兮

或容與於茆莎漾江離之旖旎兮馥汀蘭之葳蕤羗盈

揭車之披披兮曾不與狼歲而因依揭葭茨之長洲兮

濯條蕩以千陂蔭荷芰之萬頃兮錯包茅而貢之匪直

物產之富盛兮詎識乎至德之靈長出漢中之百折兮
經鄖國之惟陽導均澧而抱襄郢兮領潛沔而縈帶乎
滄浪沃蒸滍瀟於夢澤兮瀉大別而東馳於扶桑濺灑
灑以颯颯兮盪日星於無極之墟瀏測測而細罔滲漏
兮迴不失尾閭蕩冽冽以自潔兮入百谷之潢潦而不
辭洶通瀟滴以奔放兮遵咸池而東之形委蛇以跨南
北兮宛若白虹之赫曦時澎湃而撞崖壁兮突如鐵騎
之攘搶終妥帖而靜虛兮雖包荒而弗容乎颺颺唯蚪

龍之蟠驤兮韜珍產之陸離祕靈祇之幽跡兮吐雲雨
而渺瀰升一元於太虛兮龍往來之不息亮天地而利
民物兮伊誰之績躬八年之胼胝兮曰崇伯子之力欣
戴永永兮曷其敢斃肆皇明剖符兮奄茫茫之禹跡沛
汪惠旁洽兮暨祝融之宅肅藩岳修貢兮敢隨厥職迺
歌曰紀南條兮漢之浮禹所治兮安若流民世世兮奠
室疇爰宅茲兮亦何求王家其乂兮皇德是酬

四瀆潦水賦

有序

明太祖

朕嘗俯仰二儀深思其所以必陰陽之所以著今也槩
觀二儀陰陽也陰陽二儀也此其所以未知也夫二儀
本二氣之所著若否於二氣則上下隔矣若或上下始
則萬物咸亨所以亘古至今必盛暑之時則密雲浮游
於兩間霖雨大降斯太和之至矣潦水之興矣若果如
斯則生民福臻君民者仁治今當其時墨雲變黶風不
鳴條雨不破塊宜乎其時故為之辭曰

惟二氣之始和無不及而否過運氤氲於兩間濁三江

而九河清淮濟而盈海無洪濤而巨波倏汗漫而連野

騫汪洋而浸多俄微風之拂面樹倒影而沉柯昔襄陵

而懷山神禹鑿而民歌已而滔滔東注非海潮而他何

三門峻急呂梁旋渦巫山莫止來源沙陀既荆楚被隸

荷瘳久疾起沉疴均沾萬物特盛時禾爾乃蕩蕩漾漾

婆婆娑娑浮輕舟之蘭擢利漁夫之櫂蓑湍於崖壁綠

挂女蘿泛於農圃茂於蓼莪五嶽示態精英嵯峨澤施

博愛奚分巨苛便商舟之絡繹善官站之走舸會百川

之晶渺衝撞林麓之巖阿或巨魚之跳躍翩翻嫩綠之
浮荷布浮萍之滿面浴潔白之游鶩澤北塞之翠草犢
胡民之紫駝功既滂沛溢堤盈坡海上瀛洲稽顙稱臣
拜首夷倭夫何德備天地雨暘時若而不磨

濟川賦

魏文帝

臨濟川之層淮覽洪波之容裔凜騰揚以相薄激長風
而亟逝漫浩汗而難測眇不覩其垠際於是龜龍神嬉
鴻鸞羣翔鱗介霍驛載止載行俯啞菁藻仰餐若芳永

號長吟延首相望美玉照晰以曜輝明珠灼灼而流光
於是遊覽既厭日亦西傾朱旗電耀擊鼓雷鳴長驅風
厲悠爾北征思魏都以偃息託華屋而遨遊酌玄清於
金壘騰羽觴以獻酬

濟水賦

明謝肇淛

相彼神濟截流成渠既泓渟而北發復散漫而南趨爰
潛伏而不見瞥飛迸其突如粵自岱宗之麓迄於滕薛
之墟暴雨晴歆雪花夏噓寒星晝煜明河晨鋪頑石濺

髓驪龍吐珠其可得而名者七十有二而支流旁脈不
知幾千萬餘迺命司空載淪載驅或合或折或直或紆
儲其涓滴歸之尾閭引洸合泗接汶通徐浮萬石之舩
艎供上國之轉輸故雖微而稱瀆視河漢其焉殊信神
功之浩瀚夫豈鸚鵡之所能踰

洛川晴望賦

以願拾青
紫為韻

唐

白居易

金商應律玉斗西建加旬雨之時晴叶秋成而適願是
用步閭里詢黎獻皇風演溢歌且聽於昇平聖澤汪洋

誦不聞於胥怨爾乃命親懿會朋執賦邛山眺洛邑天
沈寥而雲靜氣肅殺而風急三川浩浩以奔流雙闕峨
峨而屹立飛梁徑度訝殘虹之未消翠瓦光凝驚宿雨
之猶濕嘉三時之是務觀五穀之斯入覽滌場之在勤
知滯穗之見拾及夫日色黯黯寒光熒熒遠水澄碧羣
山結青山水隱映花氣氤冥瞻上陽之宮闕兮勝仙家
之福庭望中嶽之林嶺兮似天台之翠屏宜其迴鑿輿
兮檢玉牒朝千官兮御百靈使西賓之誇少弭東人之

思攸寧不亦盛哉客有感陽舒詠樂只揮毫翰獨徙倚
願得采於芻蕘終期拾乎青紫

洛原賦

明
趙時春

將與子兮瞻彼洛洛之水滄漣而清漠披宿海而劃龍
豬暈漢宮而帶唐郭馳走周韓之郊鷗張大嶽之脚沂
鴻蒙之肇域懷麓宛其如昨帝殷厯茲祕謨期使天文
式廓命巨靈之顛負贊宗子之疏鑿奎章兆於神龜文
命受而齋淪敷貴爛若羣英炳五用於丹腹肆後獻之

製材必於是乎咨度靈光覃夫千秋伊獻哲之攸作懷
聖圖以宣文駕崑崙而磅礴爰諭俗以摛詞反斥約而
為博託音詠以諷規郁春葩之敷萼翳元白之媿微實
雞羣之孤鶴慶流行於江濱紛脣緒之繹絡鏘鈞韶之
鳳鳴亦乘秋而作鷄傳世襲其殊流義將湮而恩薄顧
之子盡諸衷懼將遺乎宗祏迺道河以沂江葛藪延其
所託錫嘉名於豫邦本太始之渾噩陟崇丘之纍纍絙
千里其如削帶湍流之喧飀噴魚龍之揮霍嗣先猷之

鴻音鼓清風於萬壑巍厚載以爭隆澤沿洛而施博燭
軌躅於無疆豈斯文之矍鑠亂曰與子遊兮洛之南南
有三峰熊耳山遙瞻淮漢流潺湲與子遊兮洛之西嶠
華連蜷蟠朱提層峰峻嶺與天齊與子遊兮洛之陽嵩
少崢嶸直太行龍門九曲道路長與子遊兮洛之野鬪
雞走馬金溝下纍纍冢墓何為者洛之原兮邙之水松
檜森森兮泉石每每沃野良田衆所美禹範周鼎有遺
趾吾與子兮從茲始

泛渭賦有序

唐白居易

右丞相高公之掌貢舉也予以鄉貢進士舉及第左丞相鄭公之領選部也予以書判拔萃選登科十九年天子並命二公對掌鈞軸朝野無事人物甚安明年春予為校書郎始徙家於秦中卜居於渭上上樂時和歲稔萬物得其宜下樂名遂官閒一身得其所既美二公佐清淨之理又荷二公垂特達之遇發於嗟歎流為詠歌於時泛舟於渭因作泛渭賦以導其意辭曰

亭亭華山下有人跂兮望兮愛彼三峰之白雲泛泛渭
水上有舟沿兮沂兮愛此百里之清流以我為太平之
人兮得於斯而優游又感陽春之氣熙熙兮樂天和而
不憂曰予生之幸兮時哉時哉當皇唐受命之九葉兮
夷與華而無氛埃及皇帝纘位之二紀兮命高與鄭為
鹽梅二賢兮爰立四門兮大開凡讀儒書與履儒行者
率充賦而西來雖片藝而必收兮故不棄予之小材感
再遇於知己心慙忤以徘徊登予名於太常兮署予職

於蘭臺臺有蘭兮閣有芸芸芳菲兮其可襲備一官而
無事又不維而不繫家去省兮百里每三旬而兩入川
有渭兮山有華澹悠悠兮其可賞目白雲兮漱清流且
或偃而或仰門去渭兮百步長一日而三往夜分兮扣
舷天無雲兮水無煙遲遲兮明月波澹澹兮櫂黃緣日
暮兮舟泊草萋萋兮沙漠漠習習兮春風岸柳動兮渚
花落發浩歎以長引舉濁醪而緩酌春冉冉其將盡予
何為乎不樂鳥樂兮雲際鳴嚶嚶兮飛喬喬魚樂兮泉

底簪鱗鱗兮尾漈漈我樂兮聖代心融融兮神泄泄伊
萬物各得其樂者由賢聖之相契賢致聖於無為聖致
賢於既濟凝為和兮聚五福發為春兮消六沴不我後
兮不我先適當我兮生之世彼鱗蟲兮與羽族咸和樂
而不知惠我為人兮最靈所以媿賢相而荷聖帝樂乎
樂乎浴於渭兮詠而歸聊逍遙以卒歲

渭水象天河賦

以題為韻

唐

劉珣

昔我先王肇修人紀乃建邦國以立都鄙或處沃而稱

輿或宅中而為美周分景臺之測用會陰陽之擬漢據
鶉首之分實為山河之理故右扶風而左馮翊距涇川
而浮渭水潼涵襟帶鄠鄠魏峩下則崇岡於地險上乃
取範於天河城雉周環而斗設宮觀駢牙而星羅轉曲
江於前岸俯翼闕於中波車馬諠流渾派聲之交錯風
塵日夕與津霧而相和蓋聖人垂則必天之象王者都
會大洽斯享運旋衡以齊玉燭法露盤以崇金掌四方
輻湊萬國攸仰風雲以之吸合日月於焉澄朗苟禎祥

而應會則乾元之攸徃何必河出圖洛出書然後為卜

食之華壤者也懿哉作者元后中興後嗣同天之道順
人之意橫橋乃牽牛之設素漑則飲龍之謂晚光澹澹
接鳳苑之祥煙曉色清明連斗城之佳氣樓臺傍而津
涯隱伏鐘鼓作而波濤汨沸不覩斯焉以取斯寧復知
王者之貴不察所由於所以又安明坎德之靈而主乎
渭徒觀其遠界汧隴橫截秦川沃長安之霞日浮京兆
之雲天都邑傍於左右舟楫來而泝沿上林之煙開霧

卷建章之戶萬門千朝而望兮蓬瀛若留乎岸側夕而臨也河漢宛在乎目前是以婁敬云被山帶河四塞為固豈不謂天道無親惟德是輔祥符下及瑞圖斯遇以登仁壽之理用表坤靈之喻請謂東周安處先生之徒與須知西朝翰林主人之作賦

渭水貫都賦

以帝王建都取諸上象為韻

唐 衛次公

清渭天鑿名都王制貫金城千里之域寫銀河九霄之勢同穴發源衆川潛泄分黑水以渺漫遶黃山而迢遞

水能濟物用導於中州君德配天故法於上帝都之會也皇皇渭之流也湯湯異東西之漚澗非汲引之沮漳夏后濬川分流非肇於伯禹秦德王水貫都必因於始皇照雙鳳之丹闕架長虹之飛梁褰裳者不勞於揭厲濯纓者何必於滄浪泛彼樓船掩橫汾於武帝濱之鈞叟感入兆於文王且夫前王酌憲惟王都之所建度地有孚因貫渭之上腴曲抱乎周原秦野旁臨乎八達九衢既流行以紅粟誠輝煥乎黃圖則知八水皆流豈清

於渭水五都並制莫大於西都原夫渭者雍之巨浸都者人之所聚天垂法君必取曳雲間之清渭何殊雲漢移天上之紫宮洞開天府及乎縈流一帶中派紆餘蕩元氣澄太虛稽前典而備矣於名川而舍諸豈惟積潤於庶物固亦近壯於皇居至乃春景澄廓晴霞朗暢涵萬象於影中度牽牛於波上客有觀光者於茲而寫望美夫取法可仰因天垂象疏紫陌而逶迤流丹霞而蕩漾周公卜洛雖云風雨所交秦后貫都實謂膏腴之壤

惟洪業之永固與渭流而彌廣

涇渭合流賦

以題為韻

唐
獨孤綬

遊者感異源而合趣指涇渭於秦樹涇如經也自北而南流渭若緯焉從西而東注性相近以不息勢使然而自遇湜湜其止昔既聞之於詩湯湯其流今則狀之為賦夫至清者渭至濁者涇惟清也鑒物之道著惟濁也合垢之義形共導金氣咸通井星混殊流之昭晰成一帶之滌滄初以縱亂橫似爭長而難雜終以潔受汙何

極睽而乃合禹功之所兩存漢苑斯焉博納乍異其色
覺游鱗之隱見必同乎聲帶長風之蕭颯象昭回之可
求歌鄭白之有由飲馬投錢足以發明廉士決渠降雨
足以殷富神州既相弘以利物寧自異乎並流知之者
齊我以不皦不昧感之者比我於一薰一蕕斯乃柔以
長存和之足貴近則順洪河之紆直遠則成滄海之濶
渭同功一體叶靈通氣信殊穀洛之流寧與淄澠之味
夫然彼獨清而無偶非達識之所謂

豐水賦

宋王孝友

豫章古號勾吳附庸自江北而徙建即南昌而分封漢
錫以富晉命曰豐梁暫畀撫隋復隸洪環困洄洄鎮山
崇崇既燾社於爵列亦要銀於縣公起造物之休息產
人傑之冲融經學齊緩衣冠魯風仕少宦情俗與古同
操觚懷鉛莫備形容粵自丹陽啓土長睨中夏命干將
於吳產資越工於歐冶鑿大駝以出鋌誅風胡而定價
發龍淵之新硎與太阿而更霸愕千仞之壁立浩萬折

之傾寫驚屑越於兕甲指飛颺於駟駕火精潛闕於吉
土晉旅瑟縮而退舍武皇築宮以旌異章帝親題而賚
下何靈物之鏗蹟淪古犴而不赦紫氣輪囷而貫斗寒
芒剌奕而爭夜孔章雪鏑於久蟄壯武服之而驚侘始
丙粲於北巖終耿光乎少華眷天寶之必復駭延平之
儵化凜冲氣之攸在非見驟而驚乍玩雙鐔之書贊豈
取次而假借迺若池山濯秀芙蓉浴日真靈所栖厥惟
始豐新郭是營永徽偃功章水徑其北曲江匯其東帶

二水之交流襟三洲之長雄洪濶舞蛟巨隄暝虹下千
艘之粲白動檣牙之颭紅灌輸輻湊泉貨阜通若夫晚
瀨無波夕景涵空聽煙外之鳴榔認鷗邊之短篷髻髻
笠澤依約吳松晞濠上之游鯈亞洞庭之橘宮竦伎前
聞侈觀後躅威鳳巢其高岡鷺雛啐於幽谷客棲神丹
淵生金粟藥石鏤贊皇之賦寶室快涪翁之讀鼇扉之
文如在騎省之頌可續詞工長善詩妙羣玉潁墨池以
心敬軒孝泉而貌肅鄉標長樂里揭長安洲既鷺龍社

亦歌鸞精行達孝而錫封壽春羈忠而列仙追憲表之
清風誦少陵之大篇記河西之新幢哦出塞於左賢嗣
銀筦之遺響證豐碑之瑤鐫或居鄉而化行或啓宇以
旁延忠厚策勲於續敕信誼成德於同年狗一節而尸
祝壯九拜而極言偉三稱於郎宿赫再忤於師垣詩矜
豪於痛飲賦誇雄於會躔續碑語於溪堂晤賞音於平
川句折良史之竒學富尊經之篇或交臂於射鄉或冠
倫於黌省伸謹議於黌醴建遠圖於推茗欽孝著於宰

木慕廉稱於安定焚妖像之眩俗斥叢祠之干正或乘
車於五齡或用鉞於百乘裁效牽之絡繹予蠲除之僥
倖外夙著於模楷內兼優於文行扁華椽於補史勛師
說於西岡詠春還之清詩諷金影之名章議論欲超於
峨岷種藝或規乎壽張墮謫仙於樊樓精象數於草堂
書哀至孝之通神卒感仁言而弗忘睇黃墟之高標想
西陂之逸韻賦嚴瀨而軒渠誦贛灘而奮迅慨玉樓之
感歌弔竹坡之形影揭誠齋之墓表哦水心之篇詠宜

蠻夷覲德以心化淫瀕收波而神聽或遵養於宗府或
厭直於儀曹指退軒之奎文問竹坡之詩豪或廉問於
兩驂或通夢於三刀莫不富水其清侯峰其高位不滿
才榮未副褒或默或言各惟所遭道有升降一人之本
薰然慈仁告新令尹雷裴顯晉張柳稱唐亦有朱馮可
以搜揚詩稱水部律進奉常或振廩以同食或鞭石而
固防盱南稱陳臨汝表江返宿習以改紀樂半環而祀
王贊府景伯專媿有唐非無印曹上坡位揚亦有少僊

宋劉相望宛其風流膏沐曄光巍巍寓公赫赫明府於
祭大興發敬溥詡魯無君子斯焉取斯

泛滹沱河賦

明
石瑤

介然子將如東瀛放舟於滹沱之浦覽郡國披山川辨
土壤聆風泉俯象六極仰窺無垠問遺俗於故老招海
上之飛仙於是捐漁人而進之曰子亦知夫茲水之源
乎出自繁峙經於代谷放乎鴈門之坂帶於太行之麓
朔方巨嶽實扼其胷恒衛諸流半入其腹氣吞萬壑激

碗礪而未平勢應三泉墮平原而愈感時乎春冰乍融
積雪方解支流趨順客浪藏駭迂迴漫延千里一帶雷
石成渠鏘波赴海千城藉其潤色萬畝資其灌溉鉞錚
鳴帝子之環嘔軋散將軍之凱編桴賈客燈火輝煌罷
釣魚郎歌聲欵乃方洲乍晴倏昏忽明擘神農之遺譜
得靈均之杜蘅及夫積霖未止秋水大至巨濤圻空駛
溜軒地律令助威飛廉擁勢海若為之改容巨靈因而
避位鯨翻渤澥鬼母長嘯虎栗昆陽英雄失智山刊苗

駭野誅樸檄先驅一指崩沙潰屋怒留城邑薪藁如雲
殃及鱈魴僵尸遍谷亦有傾城摧山變陵不雨而怒無
龍而興湍隨鯤徙勢若雷崩斷岸蒙隕殷輪牟赤平岡
被蓄戈戟猶青霆擊斷趺訝魚龍之識字渚留袍笏豈
犀火之通靈乃有泗濱磬浮汾陰鼎見寶鏡入秦號鐘
歸楚涇陽嫁女簫鼓猶喧龍叟射綃波濤飽戰壞百尺
之長橋剗千年之古塹人懷魚鼈之憂國有沼池之歎
忽幾劫之餘灰出昆明之一旦蓋自列國兵屯朝齊暮

秦盟渝韓魏兵來蘇門趙國上卿功名一擊平原公子
車騎長奔虎狼勢成合從事緩頗牧既亡望諸已晚建
不出援丹空起變常山之蛇陣徒存主父之龍顏幸返
復有劉項相雄赤旗建功淮陰古壘東垣廢宮王霸詭
冰再光舊版蕪亭飯麥猶著遺忠保河北以待朕亦何
異於關中乃至開元弛網漁陽肆毒投鞭斷河驅王入
蜀常山太守首扼天下之吭帳下豬兒竟破羯奴之腹
惟宋有國茲當九陸契丹伺便西下來窺築甬梁津任

布有備邊之策山崩海覆劉竦興致死之師自餘紛紛
以暴易暴中更幾秦世歷多號劉琨有志獨枕長戈虞
詡難逢空增萬竈太平之日少於戰爭中原之俗半多
胡帽是宜地下白骨多於黃土長河東奔為泄其怒摧
車卷甲盪百世之餘光濺沫飛流刷遺羞於千古山蓋
不得不峻水蓋不得不駛陵谷蓋不得不變城市蓋
不得不徙是雖天時人事交會之偶然然亦豈惡殺
好生造化之得已者乎乃知天本待人地亦藏宅畀吾

祖宗增其式廓既定鼎於金陵又相居於恒嶽若成周
之豐鎬復營邑於伊洛於是山多獻靈川亦效職噓氣
成雲蒸地得澤不須劉累養靈沼之二龍亦有豫且得
白龜之徑尺木多杞梓自河而東波有鯉魴望海而入
其有異氣蘊鬱孕為賢良輝煌事業璀璨文章高門大
壽紫綬金章或名流乎林藪或身負乎網常乃若蘭陵
著述功裨墳典文貞諫論治逮成康閣敞平津屢屈吾
丘之博辯屏張便殿猶存李絳之封章武惠忠誠身兼

將相韓維兄弟並在巖廊趙賓客之名懸調燮黃牧伯
之風挽循良一代龍頭世頌文忠之相業兩朝司馬名
登恭敏於旂常是其在昔有作於今益昌孰非山川之
所鍾毓地氣之所敷揚者乎矧吾生之行休值海波之
方晏駕木蘭之長舟縱千里於遐覽橫桓伊之古笛飽
廉頗之一飯藉荒磯之芳草憩清風之別館采江離以
為佩畦揭車之九畹悵九原之莫作想古人之如見於
是流魚出波沙鳥鳴苑月華窺林露色淒晚樂未極而

悲已生日已夕而路猶遠既引領而高歌又一唱而三
歎浩浩乎飄飄乎蓋不知吾之所欲之而忘吾之所欲
返也歌曰山窅窅兮波鱗鱗臨長洲兮思古人魚來迎
兮鶴與吟惟秋鴻兮北以南志不可騁兮樂不可殫還
予舟於江臯兮吾將續先王之遺音

浮沅賦

明

張時徹

釋輶兮乘舲肅徒兮戒旅鼓榜兮擊汰橫橈兮樹羽鯨
鯢孔兮風颭颭鼉鼉鳴兮水搖曳天冥冥兮白日昏雪

飄飄兮雲之際層崖豁以豁
研削壁矗而巖負洪流兮
湯湯白石兮齒齒高樹折兮
烏亂啼空谷震兮沱岸徙
俄轉瀨兮若奔忽赴曲兮彌
駛驟若驚颺赴若電熾柁
不及迴竿不及繫崩濤觸石
應聲輒碎舟子愕兮色喪
僕夫慄兮神悸於是祈宓妃
禱玄帝禳天吳詛屏翳裂
衣袂施斧剖塗孔罅榘齟齬
旋既昭兮復離乍將固兮
忽弛睇羲和之寢曜懼陽侯
之繁崇命舸舟以改載沂
明月而東逝雖禍福之有定
執行險而不躓

臨渦賦 有序

魏文帝

建安八年至譙余兄弟從上拜墳墓遂乘馬游觀經東國遵渦水相羊乎樹下駐馬書鞭作臨渦之賦曰

蔭高樹兮臨曲渦微風起兮水增波魚頡頏兮鳥逶迤雌雄鳴兮聲相和萍藻生兮散莖柯春木繁兮發丹華

臨川賦

晉應貞

陟縣岡之迢邈臨窈谷之濬遐覽丹源之冽泉眷懸流之清波漱玄瀨而漾沚順黃崖而蕩搏激重巖之絕根

拂崇丘之飛岑然後陰渠洞出邊澮旁開倏熠高鶩皓
暄長懷盤溢鬱沒雲轉颺迴屏側為之飛隕壁岸為之
陂隕列以青林蔭以綠枝檉松翁茸於其側楊柳婀娜
乎其下水則高溜承崖懸泉屬嶺別流分注冰瑩玉靜
清波引鏡形無遁影

御定歷代賦彙卷二十六

謹案卷二十五第四頁前四行鯨鯨躡躡於垠隙
刊本踳踳訛躡躡據文選改

第五頁前八行傲自足于一嘔刊本嘔訛軀據文
選注嘔與謳同改



總校官庶吉士臣張能照
校對官編修臣楊壽楠
騰錄監生臣洪策

欽定四庫全書薈要

集部

御定歷代賦彙卷二十七

御定歷代賦彙卷二十七

地理

五湖賦 有序

吳楊泉

惟東三
夫主五湖而察其雲物皇哉大矣以為名山大澤
必有記頌之章故梁山有奕奕之詩雲夢有子虛之賦
夫具區者揚州之澤藪也有大禹之遺跡疏川導滯之
功而獨闕然未有翰墨之美余竊憤焉敢妄不才述而

賦之其辭曰

濬矣大哉於此五湖乃天地之玄源陰陽之所祖上值
箕斗之精與雲漢乎同模受三方之灌溉為百川之巨
都居揚州之大澤苞吳越之具區南與長江分體東與
巨海合流太陰之所寔玄靈之所遊追湖水而往還通
蓬萊與瀛洲爾乃詳觀其廣深之所極延袤之規方邈
乎浩浩漫乎洋洋西合乎濠汜東苞乎扶桑日月於是
出入與天漢乎相望左有包山連以醴瀆岸額崔嵬穹

窪紆曲右有平原廣澤蔓延旁礴原隰陂阪各有條格
如慮炎亂隱軫肴錯衝風之所去零雨之所薄

洞庭賦

宋夏侯嘉正

楚之南有水曰洞庭環帶五郡森不知其幾百里臣乙
酉夏使岳陽抵湖上思作賦明目披襟而觀之則翼然
動足然跂慄然駭愕然眙恍若駕春雪而軾霓浩若浮
汗漫而朝躋退若據泰山之安進若履千仞之危懵若
無識智若通微跛若不倚蹠若將馳耳不及掩目不暇

逃情悸心嬉二三日而後神始宅氣始正若此不敢以

賦為事者二年然眷眷不已一日登崇丘望大澤有雲

萃兮興歎予止興止未霽忽若有過由是清陽輝沐芳

澤觀一異人於巖之際霞為裾雲為袂冰膚雪肌金珙

玉佩浮丘羨門斯實其對因言曰若非好辭者也臣曰

然然則若智有所不通識有所不窮用不通不窮而循

乎無端之紀若得無殆乎臣又曰然然至極則物應思

精則道來嘉若之勤無譁無談吾為若稱云太極之生

曰地曰天中含五精五精之用而水居一焉水之疏通
則為江兮遠則為河積則為渚兮總則為湖若今所謂
洞庭者傑立而孤廓然如無區其大無徒含陽字陰元
神之都曖曖昧昧百川不敢逾有若神者有若賓者有
若僕者有若子者有若附庸者有若姊妹者有若禹會
塗山武巡牧野十出百會咸處麾下每六合澄靜中流
迴睨莽莽蒼蒼纖靄不翳太陽望舒出沒其間萬頃咸
沸彊而名之為巨澤為長川為水府為太淵縱之不踰

跼之不卑乍若賢人以重自持誘之不前犯之愈堅又
若良將以謀乎邊澎澎濞濞浩爾一致又若太始未有
仁義沖沖漠漠二氣交錯又若混沌凝然未鑿此乃方
輿之心胃溟海之邪廓也三代之前其氣滲落落浩浩滔
天與物迴薄滅木襄陵無際無廓上帝降鑿巨人斯作
乃命玄夷授禹之機隧山堙谷滌源暢微然後若金在
鎔若木在工流精成器夫何不通是澤之設允執厥中
既其其性遂得其正有升有降有動有靜臣應之曰升

降動靜可得聞乎神曰水之性非圓非方非柔非剛非
直非曲非玄非黃畫象為坎本乎義皇外婉而固內健
而彰降以姤始升以復張其靜處陰其動隨陽六府之
甲萬化之綱式觀是澤乃知天常若乃四序之變九夏
收處烘然而炎沸然而煮羣物鴻洞燦為隆暑澤之作
頽然其容若去若住若茹若吐靈趨怪覲香不可覩蒸
之為雲散之為雨倏忽萬象如還太古真可嘉也若乃
秋之為神素氣清泚肅肅脩脩羣籟四起澤之動黝然

其姿若挺若倚若行若止異宮離離為之騰風蒼梧崇
崇為之供雲四顧一色黯然氤氳其聲瀾瀾若商非商
若徵非徵東溱海門一浪五千里又足畏也言其狀則
石然而骨岸然而革氣然而榮降然而脈有山而心有
洞而腹有玉而體有珠而目穹鼻孤島呀口萬谷臂帶
三吳足跬荆巫或企然而望或翼然如趨彭蠡震澤詎
可云乎臣又問曰澤之態已聞命矣水之族將如何居
神曰大道變易或文或質沉潛自遂其類非一或被甲

而鬻或曳裾而仵或秃而跋或角而蜿或吞而呀或吐
而牙或心以之懈或修以之暇或修臂而立或橫驚而
疾或髮於首或髯於肘或儼而莊或毅而黝彪彪玢玢
若太虛之含萬彙各備其生而合乎羣者也臣又問曰
若神之資其品何如也神曰清矣靜矣麗矣至矣邈難
知矣肇於古古有所未達形於今今有所未察非希非
夷合其心於自然然後上天入地把三根六况水居陸
處夫何不燭彼鯨鯉之賢轡龍之仙乃吾之肩也其餘

海若天吳陽侯神胥齷齷而遊曾不我儔臣又問曰易
稱王公設險是澤之險可以為固而歷代興衰其義安
取神曰天道以順不以逆地道以謙不以盈故治理之
世建仁為旌聚心為誠而弧不暇弦矛不暇鋒四海以
之而大同何必恃險阻何必據要衝若秦得百二而帝
齊得十二而王其山為金其水為湯守之不義欬然而
亡水不在大恃之者敗水不在微怙之者危若漢疲於
昆明桀困於酒池亦其類也故黃帝張樂而興三苗棄

義而傾則知洞庭之波以仁不以亂以道不以賤惟賢者觀之而後得也於是盤旋徙倚凝精流視罄以辭對
倏然而晦

洞庭賦

有序

明 廖道南

夫靈飛之曲神人所詠歌也白雲之謠僊姥所贈遺也
宣玄機於古調泄天巧於元聲雋永優柔溫醇擘緩是
以黃鳥嚶嚶伐木之義興焉白駒皎皎束芻之愛形焉
迺若洞庭君戴切雲之冠翳承日之華窮深致遠極幽

析微卑典午之三謝陋建安之七子脫其近習超於太始庶斯文有託吾道不孤也已爾其辭曰

善天地之渾噩兮先五行而乘氣機列津潢於躔舍兮騰霄霹靂而滋濡迺潤下其濔汭兮象左旋而東注莽
困遘之舉濔兮西大海乎天之宇繫君子之體物兮習
重坎而需允澤源咸池之決灑而瀉勃兮濔濔記之溷
澆羨五湖之浸具區兮揚靈乎三江而權之震澤濔濔
其縈洄兮洞庭灌漭以神倪望峩粵之建霞標于零穹

窿之空翠峰縹緲而巒岿兮瀆扈練其漁萃泉白雲之
繚繞兮洲明月乎余將征狎鷗鳥於前汀兮鳴朱鴈而
嘯玄鯨驅河伯使負舟兮叱陽侯使回楫江妃海童絡
繹余後先兮萬靈鼎鼎其剗剗擊扶桑之翹英兮藹建
木其如雲吸陽精之沆瀣兮瑤膏玉蕊碌礫而繽紛友
偃佺於玄圃兮招馬師皇於流洲謁東方君於暘谷兮
駕應龍其蚺蜺爾乃辭閭闔之貝闕兮抗軒轅之瑤旃
曳芙蓉之霞裾兮舞羣鷁而遊鈞天招太一於紫宮兮

卧都房以終日寂闕寥溲其緬藐兮忽不知予之所極
重曰造化莽眇吾何求萬形生滅奚可留往者傳舍來
綴旒俟河之清祇增憂東方煌煌三五收日中見斗河
漢流終風且霾啼鶴鷗鳳凰竄伏陰巖幽我歌洞庭阻
且修君子崇德令名悠於胥樂兮為好仇

汎彭蠡賦

有序

明李夢陽

正德六年夏五月李子赴官江西南道彭蠡之湖作賦

曰

仲夏滔滔兮湖水洶湧戒舸舟而逆進兮志定意恐朝
發湖口兮巉石纜牽檣帆千張子陵急洋而縱船洪滂
吞吐兮杳莫界際淡漫瀟灑神精搖兮浪起伏而來曳
曩余誦夏記與鄴經兮識彭蠡而心慕繁厥水集流夥
兮挾十州川而北注合岷江東之為東江兮脅揚吳而
騰海包敷淺而渚之兮撼匡廬而使改惟據巨者附斯
衆兮滿之者驟必溢彼何怪弗之潛兮抑何摧而靡殛
射者萬鼓之千兮叢谿壑之湊趨彭蠡崩以箭疾兮勢

獄頽而電舒匪莫究始兮散孰察其終龍蛇逐之何載
兮至今窟而以宮析之錫嘏兮侮之擬肯怒之風雷愉
之霽兮亦厥靈之攸逞潮崖客以歷闕兮倏當晝而忽
陰上下既顛置兮孰又辨昕昏與北南睇衆山之劒攢
予爭負高而竟降闕膏麓之淤澱兮奄焉墊而為江緣
木末而巢室兮民浮居而舳艫悼隻雛之寒嘯兮寂氓
濱而守衆亂左蠡之沸沸兮壯康郎之浩汗濤沃日而
明暗兮變島潛而渙散瀾已俛而復昂兮渦溢凜而接

連龍無風以橫飛兮潭澄渟而布連龍夭矯以戲瀨兮
粵楫汎而吹沫光焮沕之昧昧兮魚蠶貫而鱖鱣具區
洞庭方余不暇兮懼九圍混而黜冥苟清濁軋其頽頽
予聖愚一而泯靈胡弱草丹而華兮反泓棲而矜彩鳧
苾龍鬚兮蘆葦菰繁其被汀兮紛振翰而雲駭彼陽鳥
既逝兮鶻鴞嘻而專已羈水馬以闖犀兮蛤又濡珠而
曝殼詭殊錯以跳踉兮有曲牙而鹿其角既逆鱗而返
舌兮復豬首而象鼻孑鍼尾而戟鬚兮族鼉鼉乎濇濇

誰非含生而願遂觀彊柔之闡濟兮唾陽侯之懦怠縱
鱷鼉之恣肆兮甘失職而蔓災虞坤漏而陸沉兮條一
歎而三泣蠅吸颺而排沙兮時負渚而人立濺雨迸而
冠岫兮岸衝樞而壑落詫妖詭之多態兮魄撼促而心
愕瞬兮異觀恍兮變索究之諒奚以兮聊戢楫而遊淨
夕景掣以波下兮石鐘碎礮而竅吟追三苗之即敘兮
亶文命之訖敷被九江未之殷兮余誠憂鬼類之聒呼
迺撓人之罔諳兮祠九首而正邪愚者吾靡疵兮鄙明

賢之用頗景神姦之勒鼎兮數歷誰弗竟危魍魎支祁
倔强伺間兮倫臨湖而嘯悲

震澤賦

明朱右

客有鄒陽生號遠遊公子倣儻瑋瑰超竒拔偉衣白雲
之翩翩莪危冠之鞞鞞神怳怳以欲逸風飄飄而凝佇
於是上會稽探禹穴訪遺蹤超洞壑軺車前驅輜重紛
錯王子進之以笙鶴江令贈之以芍藥邇乃揚颿錢塘
鼓楫中吳將欲窮覽山川壯遊江湖造松陵主人而驩

然從予主人曰子號歷覽亦嘗聞澤藪之大有三萬六千頃者乎生曰未也可得而聞與主人曰唯唯夏曰震澤周曰具區下屬三江實為五湖右接天目宣嶺出溪之原左通松婁中江入海之如衆流之委羣利之儲蓄溪出其南溧水經其西五灣瀦其東垂虹界其隄流甘泉之清液隱雷灘於北隈洞庭中起林屋天開渺彭蠡吞雲夢駕雷夏軼孟諸杳不知其幾千里之為遠疇能計之三萬頃而有餘其澤則汪灑浩汗洶涌齋澣瀰漫

津溟渙渙云云流颺吹波結絡龍鱗日光玉潔澄沍網
緼清瀾凝漪錦花成文浪濤噴瀆澎湃法粼出雷騰虹
蒸雨生雲呼吸陰陽吞吐乾坤如潮汐之不測或早暮
而異觀飛揚蕩薄迅瀆汨淪千態萬狀不可殫論其數
則碧沙曼行黃石碣砭莎薛蒹葭白蘋青蒲荇芹蘊藻
芡菰荻蘆蔓菁杜若江蘼靡蕪芡實雞頭草長龍須艾
荷翠沃蓮藕芡蓴衆物居之何可勝圖其土埤則塗泥
微露埤濕就乾歲新蘆蒿莖芷蘅蘭菖蒲馬荔荃蓀射

干巧楊絮白水柳葉丹蘋蓼早綠榆楓暮殷朱橘火齊
黃甘金丸連枝並秀駢集乎其間爾乃周流梗概溥覽
爛斑兩兩相峙鬱乎宗山其山則曾巒崑崙疊嶂嶙峋
岑嶽參差如陵如墳崔嵬齒萃陂陀糾紛上拔仞岡下
臨瀆漬控地軸以旁礴逐水曲而折旋馬跡屹立以疑
竅翠峰峻拔以盤桓夏浮雲之流景俯蛟龍之深淵空
谷豁訝以無底磴道蜿蜒而相連其中乃有奉真之祠
供佛之堂琳宮道館梵宇禪房煙雲縹繞金碧焜煌黃

冠緇衣往來而尚羊談玄讚空學幻言吮或高堂以演
玄或擊鮮而稱觴駕白魚之飛艇泝重沱之流光水產
則黏蟻旋螺土蛤石花鮎鱧鯽鯉鰈鱠鱠鮓鮓鮓鮓鮓鮓
頰尾之魴細鱗之鱸紫甲之蝦稻蟹盈尺巨鼈專車長
蛟潛鱷穹龜靈鼉周游涵泳其樂無涯羽禽則晨鵠莊
雞鵲鶴鳧鷺交兼鴉鴉鴉鴉鴉鴉鵲鵲羣鴻來賓陽鳥攸居
駕鵝遠舉鷗鷺忘機王雉並鷺屬玉交飛振翮刷羽以
教以嬉來如雲集去如煙晞若乃絕岸之濱漸水之石

或伏或倚或卧或立或方如珪或圓如璧或矗如峰巒
或平若几席或滑如肱肪或廉若劒戟或赭而赤或蒼
而碧或縞如玉或黝如漆為中流之砥柱若逆河之碣
石怪怪竒竒熒熒磔磔斯又天造之神工而出於茲水
之蕩激也思昔夫差競霸圖勲麋戰於此勝負未分旌
旗蔽空舳艫如雲始魚鼈以為樂終麋鹿以成羣迺若
歸釣之徒著書之士去國鵠夷汎舟西子亦復眇眇滄
波茫茫白水主人之辭未終鄒陽生庸乎改容喟然而

歎曰甚矣世道逾下而人心之不古也吾子好學頗識
典策不述職方之經邦而盛稱茲澤之庶殖不思禹蹟
之胼胝而徒歎英賢於戰國皆非所以極遊覽之願望
而擴夫五行之至德也遐思往古擊節太息請誦主人
所聞而陳子所得烏虜噫嘻浩蕩方割懷襄未平九域
混而莫辨百潦壅而不行支祁崛強於淮甸天吳披猖
於海溟時維茲水震蕩靡寧淳淳洶洶若若轟轟疑撼
天而動地猶駕雷而鞭霆類不周觸而天柱折若巨鼇

汴而洲島傾斯震之澤所以錫名也迨夫九載既南庶
土交正波神受職川后奉令應龍畫地以效功庚辰持
戟而制命尊吳淞以安流別淮海而表境於時澤安其
所水順其性鳴者自停動者自靜斯震澤之所以底定
也千載而下美哉禹功昏墊之害既遠灌輸之利無窮
故漁人舟子之出入豪商薄宦之經從擊楫鼓浪引帆
隨風莫不連檣接舳往來乎其中斯又具區之藪所以
出萬民惟正之供也方惟海寓清明朝廷寧謐內宣民

化外修貢職農安其耕女效其織工習其業商估其直
士守遺經民食餘力風不揚波水不濫洑方鎮以寧土
地壑闢開禹之疆廣禹之績是以九州之外咸仰聖育
沾濡乎仁義涵泳乎道德浹洽恩波沐浴膏澤漸摩浸
潤流行洋溢天無亢燥之災人樂沃土之俗試言其故
則辟離湯湯聖化行矣靈沼洋洋聖澤汪矣御溝溶溶
生意茫茫溥德川流達要荒矣下視一隅寧不隘杯水
於坳堂矣主人於是聳乎樂聞憮然自失仰神功之長

存慨餘子其何益相與鼓柷乎滄浪曾不蒂芥於胷臆
迺起為詩歌以頌德詩曰於赫禹功配天比隆生我遺
氓宅我土中原隰昉江漢為東萬世永賴維禹功是
宗於皇禹德立我民極手胼足胝救焚拯溺鑿井而飲
耕田而食靡謝天功焉知帝力於昭太上示民以應眷
佑我皇與民立命開禹疆土繼禹作聖其混合四大維
民之正於穆聖皇維上帝不常敬哉有土疊疊弗敢康
五嶽四瀆七澤九岡罔不修其職來享來王來享來王

受天之祐於萬斯年
瞻我有土有民有子有孫有
引勿替以頌茲文

珠湖賦

有序

宋

崔公度

高郵西北有湖名甃社
近歲夜見大珠其光燭天嘗問
諸漁皆言或遇於他湖中有竊謀之者則風輒引船而
去終莫能至賦曰

萬物之精上為列星
其在下者因物而成形
故在天下之偉寶不妄其所託
託物之主實內鍾乎神靈
吾嘗臨

東海旅南溟汎江淮之湯湯濟岳陽之洞庭觀其溶液
行裕蓋天地之委藏祕怪恍忽蛟蚪崢嶸宣世人之敢
指名哉若乃雲夢震澤浮梁合浦獸潛宮亭神見牛渚
直相沅以南浮懷涇渭而北顧導東而成滄浪激西而
為濫潁延平誕竒漢臯殊遇率傳載之雜出為異物之
所處或設限於藩服或效琛於王府鑠高郵之經治裂
揚州之故部有湖隸旁將三千所大或萬頃小亦千畝
逆邇孑聯絡參錯分駢布由卑以自處傾十數州之羨

沃窮山大野谿谷原數晝夜走險越千里而來赴者蓋
不知其幾千百處壓東西之波漫勢膠瀉而無涯魚則
鯉鯽鰱鱖鱗鯁鱔魴鳥則鵝鵠鳧鷖鴛鴦鴻鴛若煙
海會如泥沙蟲螺蟹若蝦蛤卉菱芡而荷華水不數舟
陸無算車灌溉乎民田漕引乎國家夾堞長陂程水環
之固護飭官命屬厭功利之紛挐迨夫地脈泉源孰為
要庶潛合陰附應淮海之谿研微風翻瀾矧其甚邪其
或駭怒決溢隄防之所不加決漭千里農民播溺宛轉

流離而不相救又況其廬舍之與桑麻噫是亦涉者之
靡觀矣瑰祥恢怪庶幾乎託焉間乃省貢書考圖編所
陳者特盤餐之微固不聞有把握之貴為當世之所傳
發詠乎川珍翔翔乎水邊爰有蘆人漁子相語而來前
曰先生之念者貨也若夫川澤之精理則不然不寶於
人獨寶於天今此有夜光之珠產於深淵我意其神先
生辨旃其始也天和景晴湖波夜平煙冉冉以四收萬
籟息而無聲則是珠也凜氣將之若海月之升含彩吐

耀周隅皆明呀紺石而為宮被綠苔以垂纓挹奔星之
光芒吸沆瀣之精英木散影子扶疎草露實兮紅青林
鳥驚而移枝羣犬愕而爭鳴於是印人徐呼上流俱起
撫鴻量以先趨領鬣苟之已試連徽挺又灑網扶柀嗟
雖鑿其着睫疑未曉其機器方詭智之漸張果造形而
已逝而况伏見靡時歛彼倏此與蛟龍之為朋會風雨
而作衛彼能三足而在籩鬘九肋而克饋漢蛟鮓之青
骨鄭龜羹之異味勅牛悅水而黃奪澤馬翫繩而足躓

犀狎獮而解角翠因媒而折翅江使被執於行役巨魚
為腊於貪餌文貝璵璣出禍其腸腹金華玉英坐窮於
淘緹蠟蜃胎寒熠燿自喜狀絕意於遐引適足殺其軀
而已矣是故號數遊者我固謂之貨也能不為珠之笑
邪予曰嗚呼噫嘻信乎言也既明且哲則大雅君子者
邪不常所居擇利害而去就者邪用以晦明知在己者
邪色斯舉矣學孔子之徒者邪薄泥塗而不辱不恥下
賤者邪川不涸岸不枯有德鄉里者邪久之不聞其遊

世者邪既而復曰嗚呼噫嘻照魏王之乘邪燭隨侯之
室邪謂上幣邪飾冠冕而佩邪客有聞者亦瞿然而興
曰嗚呼噫嘻吾聞諸石室之書云王者得之長有天下
四夷賓服然則得之者或非其心獨王者之心邪

游東湖賦

宋張耒

紛不知吾之所如今獨漫漫而若狂乘醉飽之餘力兮
遂陟嶽而緣岡惟嚴冬之栗烈兮莽川澤之茫茫農功
休乎場圃兮平陸散夫牛羊憫大木之百圍兮慘亦立

而無棠鸛鶴羣鳴而下上兮雜篔簹竹之青黃忽平陸之

既窮兮漸積水之汪洋曰是為齊安之東湖兮右派合

乎濤江荒灣寂寥而葭葦兮懸流冒乎夕陽為舉網而

無獲于嘉魚逝而洋洋弔林落之柴荆兮哀淮夷之阻

荒呼徒侶吾還歸兮陰風振而塵揚畏皇昴之將中兮

冒玄夜之飛霜顧謂童子汝其賦詩爰有小子窳然致

詞歌曰歲窮木落于大澤空鴈宵征兮天北風曷不飲

酒兮御玄冬歸來歸來于樂未終余曰汝姑置之乃歌

曰臨山川兮懷故鄉歲窮陰兮晝不暘升高堂兮潔余樽耿余思兮古之人

南湖賦

元陳世昌

禾城之南有積水焉界吳越之土疆直斗牛之星躔雖川浸之不侔亦泛濫之所先挾地勢之爽塏匯清波之淪漣紛纒纒其來屬咸增竒而效妍若乃其源委也則天目之崖苔雪之溪東會吳淞西撫禦兒支流旁達聯絡相繼以灌以溉以遂夫土宜其南則長水之塘父山

之鄉出硤石道海寧岸絕兮望洋其北則杉青之閘平
望之亭表裏湖江并包濁清衆流之趨混浩浩以達於
滄溟其上則有良田行沃灌木叢泓麻麥夏熟杭稌秋
登溝塍綺錯原隰縱橫蔬圃之利瓜芋薤菘蘆服茄莎
實繁有生其中則有萑蒲葭茨澶漫渺瀾紅葉濯錦翠
荇牽絲菱生而紫角爭奮芡長而紅頭欲齊玉截肪而
無玷珠脫蚌而未纍可以續食代飽為水蔬之珍奇魚
則鱖魚鰻魚鯉魚鯽魚白小羣鮮雜以蜆螺網罟相求

泌御交加霍如霧散倏爾雲遮或鱗甲璀璨或鬢鬣
髮或貴列鼎俎或賤比泥沙以得之而厭飫恒家益而
戶夸鳥則鴛鴦鸚鵡鳧鷖春鉏羣娛競沒去曉來哺起
如飄風泊若浮壺逶迤止渚唼菰蒲增弋之所止且
若乃時雨降川澤盈春流汨其乍起綠波盪以鱗生於
是淑景布麗微風扇和青莎綠堤虹梁跨坡都人士女
往來婆娑列綺席間清歌揚桂楫浮綵舸以樂時雍既
麗且都又若潦水盡寒潭澄天翳絕湖鏡平望頽陽之

西下見明月之東生漁歌互答水調淒清輕艫短檝比
渚連汀實豫且之攸樂匪伊人之所恒別有浮屠之宮
號為真如孤塔宮堯仰攀雲衢俯瞰川陸渺濔縈紆巨
浸涵其表遙峰峙其隅極南湖之壯觀攬秀色而無餘
有唐名臣實為風氣之所聚亶乎昱而光新凡湖之美
盡是而不乏所陳矣嗚呼噫嘻惟昔春秋敵國初鑿言夫
差勾踐各奮其謀疲民以逞暴骨為丘槁李敗師甬東
使居越不為僂吳其沼乎然則是水固嘗閱前代之興

亡鑑當年之成敗洗干戈之污鱗復民生之凋瘵語其
量一勺之多語其用五行之大豈真涵煙波浮藻采狎
遊觀資玩愒而已哉客有謂賦者曰洞庭彭蠡之水天
下之大者也子不是之求而獨甚譽於茲水不已過乎
予曰不然人情忽於所近小大各有攸當是故鷗鵬扶
搖萬里而斥鷃亦自足翱翔泰山之高千仞而不能有
加於毫芒莊生所謂目擊而道存隨寓而無方者也亦
奚病哉乃為之歌曰南湖之清兮可以濯纓南湖之上

兮聊寄我情地之勝予獨不以人而後名後千載兮亦有慕其遺聲

汾湖賦

元陶振

釣鼈生朝發跡乎東海夕將抵乎西都遇汪洋之大澤
勢滔涵乎太虛以為洞庭邪則層樓不見暈飛乎黃鶴
近山不見翠列於蒼梧以為彭蠡邪則瀉不見銀河九
天之瀑布而張不見屏風九疊之匡廬於是東覽三泖
西瞻具區然後知其為三吳之巨浸名所謂汾湖者歟

是時也日落蒼灣煙澹平蕪恍東山之月出遇鄰舟之
老漁停桂櫂而揖余言曰吾將告子以汾湖之所以得
名衍子以汾湖之大義子亦樂得而聞之乎是湖也兩
界中分南北無虧其南也則千縷之無盡其北也則百
弓之有餘故其南半為嘉禾之境其北半為松陵之墟
湖之得名其以是歟故老相傳信而不誣原其始則具
區之溢出而旁匯乎此潏然亦安知其不濫觴乎崑崙
之頂泄瀚海而來尾閭者邪乃若微波不興一碧萬頃

如青銅之淨拭似白練之平鋪颼風倏起長鯨怒呼拔
銀山之千尺卷驚濤之雪如使觀者不覺心戰而膽慄
頃刻碎行人之輓轡其產則辛夷杜若菡萏珊瑚大貝
之寶明月之珠春水桃花之鱖秋風蓴菜之鱸白蘋奪
淮西之風味紫蟹剖吳下之膏腴又有魚鱗之屋水晶
之居其源莫測其奧莫窺構波神之窟宅瞰馮夷之幽
都月白風清似或聽廣樂釣天於縹緲雲消雨霽恍若
見金支翠旗之有無既無凌波之仙子豈無騎鯉之仲

夫玉宇生涼則足以稱純陽飛劍之渡綠雲曉漲則足以供漢陰抱甕之斟散落霞錦光於蕩漾濯殘陽紅纈於扶疎昔杜少陵空有漢陂之樂曾不及此一觀李翰林空有郎官之汎曾不及此一窺故凡游乎此者自有以得其樂又何必渡黃陵而遊赤壁隔滄海而望翠蓬與冰壺也哉雖然此特論其槩耳若夫地靈人傑同德相符則有陸龜蒙之名裔陶弘景之後徒天游子學貫乎載籍六一翁道究乎精蘊雲樵先生之磊落采芝逸

士之清臞是數公者莫不韜光於草澤混跡於樵漁披
羊裘於風雨恣綸竿之卷舒一暴不肯却淝水之戰一
箭不肯射聊城之書仰高名於辭漢之嚴子慕清風於
去越之陶朱悉能葆清光於治世處高明而不污吾嘗
品其人南州高士之列孰云誕而為迂若是則今之汾
湖不獨有異方奇物之產神仙巨靈之宅抑且為浙中
人物之淵藪東吳學海之歸墟也語畢老漁鼓柁波間
倏忽而去飛玉龍之聲卷驚濤於別浦折風木於太湖

八百之西灣不覺七十二峰翠巒之掀舞紛落葉之相
觸灑篷牕之急雨起而視之則時夜將半雞三鳴更四
點月已墮海西丈五矣於是叱湘妃捧硯命洛神展素
援長杠大筆於青天挹蟾窟九秋之清露想老漁所述
之前言而遂寫為汾湖之賦

西湖賦

元白珽

杭之有西湖不獨如人之有眷目也如楚有金如蜀有
錦人得貴而玩之也凡水在天地間由山而出由地而

受為里合萬有六千奚止此水可誇絕於天下哉顧一
州一縣理所在水之東者皆西湖也頽有之松有之山
陽四明類有之獨在杭者齒響諸夏筆騁羣彥是蓋有
明珠玉樹不待斲而成大圭圓璧不待縑而貴者矣是
湖也發源南北之諸峰而風氣曼延乎東州之列岫近
而秦望遠而桐扣左龍飛之兩乳右鳳凰之孤味勢將
合五州之芳澤集萬山之鮮溜豈惟武林之一泉能專
此江北江南之秀原夫竒狀天造勝境人為古稱圖畫

之如則陋今日蓬萊之山亦非若欲知三歎望洋之盛
當不憚登一覽衆小之危悵天地之尤物何簡牒之偶
遺於鄴侯之六井獲肇見於唐碑盪海濱之鴻鹵弭疾
厲於羣黎今行之而為井十或通貫乎園池繼宗隄而
節水將下塘而注陂羌運漕而達河亦溉旱而涵瀾澤
及田疇之廣乃繼聞於太傅之記辭錢氏置千兵而設
撩陳氏述古資衆僧而繕治既大備於蘇公樹三塔於
中流橫六橋於長堤復繼志於趙侯與鷺播波光於板

日續麴院之一支亭館日增而月益宗禁前規而後隨
此特表其人為之序迺以見夫天造之機南北兩峰亦
有祠宇譬之龜蒙為望於魯皇妃保叔雙擎宰堵截羣
峰之駿奔為西湖之門戶冠之以南屏襟之以赤土宮
其渚以致齋圃其墟而閱武煙霞乍舉白雲不去金鐘
無聲玉岑有數鷓雞延為向背靈鷲行為胥附五峰指
列乎虎林三竺駢羅乎玉女按駝巖而巾子魏如帶東
山而石甌酷似在水中央孤立一嶼遼鶴不來處士誰

與辛庚梅之猶昨惜陳柏之非古由四刹負鼇而徙成
太一祝釐之所復有寶蓮瑞石遠映胥山之輔金地已
寶翠瓦丹柱寫影乎水許凡此前後聯絡復多嶺隲葛
公已往而丹井不改仙姥既去而慈雲如故二麥當風
篁之衝臙脂割黃泥之據萬松東接乎宮垣棲霞南沿
乎岳墓紫坊鐵冶石人大青之儔散不計其在處中有
水竹青芝法華大悲桃花瑞岡之相背巢溝龍駒之並
馳詠吳王之楓木表金姬之楊梅抑不過因人煙之所

聚曾不若朱野葛隴之得人而竒洞則有龍泓香林水
樂石屋呼理公之白猿避里人之蒼蝠煙霞乾濕二洞
往往利巖而嵌谷雖形勢之或列皆所以發湖光而增
山深泉石井潭澗谷實繁釐為十八合為一源濯惠因
之滄浪弄金沙之潺湲冷可洗耳甘可滌煩禱白鱔而
祠烏龍記水魚而碑靈鰻限玉為池跳珠為軒香山六
一參寥東遷各井其井各泉其泉終歸乎一萬頃之湖
天若他園池樓觀佛宮仙宇辯口不能殫其名巧厯不

能知其數余固拙於言辭始際陳其洩露尚慮齊人不
知有稷下徂丘徒知有管仲晏子湖詠維百先言御園
爰有聚景園經所尊致坤宮之孝養據震位以生蕃來
四朝之游幸攬衆遠以平吞南有翠芳蘭棧在焉接蓬
萊於中沚賓慧日於前軒北有玉壺紅鵑尚存創於廊
王隸於慈元去環碧兮百權隔水月兮一垣慶樂有梅
關桂林之勝珍鳥異獸之繁亭連棟為十錦碑蝕苔以
千言記南園之絕景扁西湖之洞天此皆始屬於禁禦

又不但嘗錫之侯藩次則仰真珠之高寒聽水樂之聲

在雲洞居下湖之左古柳列昭慶之外得萬景之天全

擅九曲之紫翠總宜盡晴雨之奇養樂集雕鏤之藝梅

岡斑衣擇勝秀野藹梅坡之綠陰逆花家之紅靄尚名

苑與勝圃滋角奇而闕異蝨不知其幾百十所所可言

者特言其最堂則有德生溥泳飛之仁依先覺貪濁之

迷偉觀興頑懦之志湖山廣壽樂之基二賢先賢序列

一隄表義夫節婦三十九人之樂石儼大人君子千載

一心之令儀閎雪江之講肆寒水壑之書帷隱居思真
玉連翠樾九師有美尚可按跡於品題亭稱冷泉旁連
壑雷上有天香下有客兒花光巧於公輸通玄掩於招
提春雨為觀香月為鄰水竹院落無邊風月見天地心
以總之池有湧金金牛白龜瑤池白洋分占湖之四涯
林塘之鑿花徑之構各擇其地各揭其楹非窺園則莫
知禮重崇報有國所祠夏禹據城隍之堞神胥峙輦道
之俾旌金祝之奮忠慨朱蹕之蹈危斯府君之神馬游

宰相之白衣海州死節鄂國錫圭傳嘔林於霍山之淖
薦蒲泉於嘉澤之墀維廟食於百世皆功德蒐於祀典
非若倚草附木徒禍福於六時陵墓則有后妃瘞嗣之
攢宮侯王君公之瑩碑朱少章之節旌已落馬三寶之
壺蜂不飛和靖贊寧花翁紫芝皆炳乎山靈水秀之潛
輝四聖顯應報陰相於中興三茅表忠見闡靈於內向
安晚峙上清之下初陽臺玉清之上雲濤靈曜宗真希
夷明真神仙雖藏幽占爽隱顯乎此湖要不若佛寺蘭

若後先乎重山複水之廣松門九里袁公是崇七峰兩
澗靈隱在中秀石竒木靈泉怪峰兼幽人禪衲之盛將
互見於累代能言之鉅公捷竺有三連覺接墉觀自下
而中而上始王園而臻大士之宮神檜重榮御梅猶紅
草堂繞枕流之翠香林挂古藤之虹禮寶掌而登天巖
瞻珠鬘而下乳峰前生仙而廣利後月桂而洪鐘圓覺
藏思陵之辰靈芝抱越王之弓遡雲扉之幽窈撫靈石
之玲瓏現長耳之妙相演句麗之慈風南屏列家人之

象瑞龍豁竒觀之冒五百應真萬鈞巨釜畫廊絢日鐵

塔插空惟浮慈為南山衆刹之宗瑪瑙而坡鳥窠而叢

佛三寸不為小樓十三以龕其像佛百丈不為大舟萬

斛以維之蹤借竹智光埽岳中庸惟壽星為北嶺叢林

之雄豈唐朝四百八十猶有存者而宋興幾三百載損

益其中樓閣則豐樂中峙據湖之會叢以亭榭附以闌

闌魚莊曼衍柳洲縈帶竹山城而可眺迎光雲而不礙

清曠專負山之美先得俯近水之快紅梅閣於孫沔綠

竹閣於居易巢居瘞杖於屏下四照插峰於鏡外外如

延賓望海蓬萊雲漢正遍海會顧層見迭出之多而半

為白鶴青鸞之所蔽復有如虹者六御筆仰題西冷處

士宛武揚髻斷橋非荒蕪之舊長橋有古木之依琮老

金佛節奔泉之所發行春合澗條衆壑之攸歸餘則凌

金跨玉斜斜整整將舉趾而皆迷其或男孺女桂東游

西汎畫舫蘭舟輕舫巨艦各標令名明淥清泛金勝小

而善疾寶瓶大而宜緩明玉坐百客而有裕總勝列四

筵而才半賞心汎綠百花望月皺綠翻篙流蘇颺幔坐
若室處行若物換值御舟之游幸從水嬉之宣喚前金
吾而不禁後天香之拂面鱗如翼如恍衆星拱辰於天
河之畔非萬斛之能擬豈千丈之為算別有龍舟兩兩
翼鼓馮馮花帽表於御愛繡袍見於神歌陳百戲於水
面豎六標於湖心參前兩後三令五申觀者舟兩行如
廣陌迂者錦萬竿如長林五步一亭酒旆茶烟笙歌沸
騰軒鞅紛紜柳行撲地花陣排雲梭門秋千出沒乎翠

圍舞衣歌扇周旋乎香塵新路習金雞之路祠山迎寶
馬之羣目不暇瞬步不得循想見進魚羹之宋嫂猶多
呈鶴舞之優人翦羅釘採花之籃乾飴為穿柳之鱗飾
木兵於小桁串家具於修筠蒿矢激半空之霹靂紙鳶
競九天之經綸柘彈象弩畫棍髻盆羅鞭凌波金釵照
春時固多攬紅拾翠之子亦豈無尋幽討勝之賓此特
言萬一於春九十之辰薰風動絃清和云始粲東湖之
梳林拂夾塘之荷翠紫鴈瞥過白鷗乍起早雀祠之初

度正盾日之方熾水鏡濯髮冰山厲齒移舟南向攜衾
夜艤無人世之熱惱有月宮之寒意豔麗見於水如見
於仙醲鮮取諸舟如取諸市秋容不淡拒霜已紅映後
開之茁茁雜戰水之游龍剖霜柑於驄轡簪露菊於船
篷西山賦紅葉之句南山醞紫萸之鍾北風戒寒城人
簡出肉輦酒船亦無虛日延祥之紅白梅城吳阜之高
低雪域寶騎躍長隄而蹴瓊瑤幔車穿名園而撻珠璣
是蓋四時之景不同亦各以見賞心樂事之不一爾乃

既聞遊娛之盛請言風土之美水憑山而甘潔土得湖
而豐泥松菑取種於苔雪蓮芡移根於檇李紫芋青菰
白藕紅芰文鳧章鷓黃雀錦雉魚甜蟹香筍鮮芹脆松
杉檜柏參朮蘭芷實鍾此湖山之秀故無物而不備矧
佳氣之磅礴至人材而尤異所謂傭兒販婦涵冰玉之
不翅况彼都人士褚陶杜栖之文行全琮許遠之忠義
元絳唐肅廣恩惠於民人伯玉君復抱孤貞於林翳褚
氏世濟其美於大唐錢氏開國承家於五季顧歡郎蘭

之豈弟羅隱楊蟠之峻烈宣工詩而已矣惟此人物之
盛不可殫紀方外則郭文王復馬相潘閣管歸真之流
以發揮其英聲法照贊寧道潛清順抱一子之徒以陶
寫其清氣時人但知游觀之可樂而不知景物緣人之
可貴且自有天地即有此湖羣峰注流底而成瀆尚念
東漸於海鹹惡所濡草木齧餘而色變山川薄久而氣
殂所以消沮沈昧之不已雖有此湖而如無於是築而
防之使涇渭各得其所浚而闢之俾鳶魚各遂其初風

無大浪雨無奔湍將翔將翔以佃以漁以此知古人有
功於此水將舉一朝而利萬世以無餘何寶正以還六
龍南渡搜勝挾竒重丹疊素致洞心駭目之觀非晴光
雨色之故彼徒知歲增侈而月益奢至以釜銷金之為
喻殊不知神京不返憂勤聖宇千官展轉而擇棲萬姓
彷徨而懷土故思極耳目之娛而為安旦夕之具不然
中原豈無黃河泰山之雄觀花石良獄之竒趣日月云
邁襄回瞻顧嗟居人游女不能不及盤游無度之歡而

志士仁人不能不興宴安酖毒之慮

游湖後賦

有序

元白珽

三月廿又三日張鵬飛及楊萬里李和之白廷玉汎湖
值雨各賦詩一首萬里曰隄柳春濃萬綠垂開懷消得
好風吹絕憐白也詩無敵共賞坡仙雨亦奇興欲狂時
呼酒急境當佳處任船遲宜無顧陸丹青手畫與人間
後世知余戲作小賦云
柳絮化萍濃綠藏鶯不見其處止聞其聲此豈非春工

之極致歟湛然宴坐輕舟自行萬姿千態遠山縱橫透
疎簾而濕衣忽驟雨之若傾甫下矻而閉戶才頃刻而
復晴白子酒稍酣矣奮鬣而慷慨曰此何為者邪悟慘
舒之不常於是誦趙抃表忠之奏歌蘇仙薦菊之章彼
割據於五季若錢氏之數王渺丘壟之無跡愴松楸其
可傷涸銀海而出金盃穴狐兔而上牛羊豈不亦雄傑
一時兮終若雍門之泣孟嘗賦梅處士妙解影香骨可
以腐千古不亡鬱孤山其硤兀擁萬樹之青蒼罔蔗節

之遺恨保故封猶若堂天道茫茫一雨一場榮悴隆替
柔剛微彰謂偶然不足芥蒂兮曰作善降之百祥謂理
有必可恃兮曷顏天而蹠長二客方李遨頭目張嗔無
故而多事擬陳迹而揣量指金叵羅其猶淺兮舉大白
而罰之觴白子曰不然老陰為六老陽為九老則必變
如屈伸肘惟知變者可與長久知六之變固乃可守知
九之變健不為首顧此湖中之舟與舟中之人寧常壽
而不朽能畏謹以自修庶吉亨而無咎幸乘時而過分

負且乘宁致冠環綽約之蛾者佩金印而如斗管絃沸
其前後紫緋奔其左右一旦不能自保率同歸於石友
蠹苗竄於三危防風橫於九畝曾不見或裸體以旱魚
或跣足而踏藕伴帶索之榮公甚泥塗之絳叟立層冰
而弗寒野茹僅其適口無樂亦復無憂不自知其不偶
豈不勝於孟晉而疾顛者乎此莊子所以不為廟犧而
李斯所以憶上蔡之狗也舟且抵岸悉闢其牖賦詩各
成有核再取有化而無無化而有雨晴晴雨紛糝結糾

斯時也度夕陽猶未至於酉多言數窮姑相與大笑盡樽中之酒

御定歷代賦彙卷二十七